

ጴጽሮሲ ጸፊዳ ናምእንሉ ኪታ ጊደ ቆፋ

ሃዋሬ ጴጽሮሲ ናምእንሉ ኪታ ጸፊዳይ ዲማ ዲማሶን ዲዛ ቤኒ እማኒዛ አሳሳ፤ ሄ ኢዛ ኪታሰ አይፌ ዮኑይ ዋርዶ አሰታማሬታ ኢታ ኦሶኔ ኢሰታ ተሚርቲ ጋሶን ዪዳ ባላ ዴኦ አሳይ አጋና ማላሳ። ሄ ዋዴ ሜዴቲዳ ሜቶታ ቢርሻናሰ ዳንዳያናይ ዬሱስ ኪርሰቶሳ ካሴ ባ አይፌራ ቤኢዳይታኔ ኢዚ ታማርሲሺን ባ ሃይፋን ሲዪዳ አሳቲ አሚዳ ተሚርቲ ባጋራ ጸሳ ጊሻሲኔ ጎዳ ዬሱስ ኪርሰቶሳ ጊሻሰ ቱሙ ኤራቴሐ ዴሞ። ጸፊዚ ሃራፔካ ሎኤሊ ናፔቲዳይ፥ «ኪርሰቶሲ ሃ ሲሚ ዬና» ጊዛ ዋርዶ ተሚርቲ ጊሻሳ፤ ኢዚ ሄሳ ጊሻሰ ዮቲሹ፥ «ኪርሰቶሲ ኤሌሊ ሲሚ ዮንታ ማላ ኢዛ ዲጊዛይ አሲ ዉሪካ ባ ናጋራፔ ሲሚዲ አታና ማላፔ አቲን ኦኒካ ጳያና ማላ ኮዮንታ ጊሻሳ» ጌሰ።

ሃ ማጻፋይ ኦይኪዳ ኩሜላ ቆፋ

ጌሎሶ 1:1-2

እማኒዛይታ ጳይጌቴሐ 1:3-21

ዋርዶ አሰታማሬታ 2:1-22

ኪርሰቶሳሰ ናምእንሉ ዩሳ 3:1-18

¹ ዬሱስ ኪርሰቶሳ ኦሳንቻኔ ኢዛን ሃዋሬ ጊዲዳ ሲሞና ጴጽሮሳፔ፥ ኑ ጎዳፔኔ ኑ ጳሌ ዬሱስ ኪርሰቶሳፔ ቤቲዳ ጸሎቴላ ባጋራ ኑ ዴሚዳ አማኖ ማላ ቦንቹቲዳ አማኖ ዴሚዳይቶ!

² ጸሳኔ ኑ ጎዳ ዬሱሳ ኤርን ኪያቴሊኔ ሳርይ ኢንቴሰ ጊደ።

ጸሳን ጳይጌቲ ኢዛን ዶሬቴሐ

³ ባ ቦንቹኒኔ ባ ኪያቴላን ኑና ጳይጊዳይሳ ኑኒ ኢዛ ኤሪዳ ጊሻሰ ኢዛ ጸሳቴላ ዋልቃይ ዴኦሲኔ ጸሰ ጎይናናሰ ኑሰ ኮሺዛዝ ኡባ አሚዴሰ።

⁴ ባ ቦንቹኒኔ ባ ኪያቴላን ቦንቾ ዋጋይ ዲዛይሳኔ ኬሂ ጊታ ጊዲዳ ኢዛ ሂዶታ ኑኒ ዴሚዶሰ፤ ሂይታንታ ባጋራ ኢንቴ ኢታ አሞ ጋሶን ሃይሳ ሃ አላሚዛን ዲዛ ጳዮፔ ኬሲ ኤኪዲ ጸሳቴላ ሃኖዛፔ ኢዛራ ጊሹቲዛዴንታ ጊዲዴታ።

⁵ ሄሳ ጋሶን ሃይሳፌ ካሊዛ ሚሻቲ ኢንቴሰ ጉጃታና ማላ አኔ ሚኒቲ። አማኖ ቦላ ኪያቴሐ፥ ኪያቴላ ቦላ ኤራቴሐ፤

6 ኤራቴላ ቦላ ባና ሃሮ፣ ባና ሃሮ ቦላ ዳንዳያን ሚኔቴላ፣ ዳንዳያን ሚኔቴላ ቦላ ጸሳስ ጎይኖ፣

7 ጸሳስ ጎይኖ ቦላ ኢሻንታራ ዶሴቴላ፣ ኢሻንታራ ዶሴቴላ ቦላ ሲቆ ጉጂቴ።

8 ሃይቲ ኢንቴሰ ዳሪ ዲዛዝ ጊዲኮ ሃይቲ ኢንቴና ኢንቴ ጎዳ ዬሱስ ኪርሰቶስ ኤሮን ጎኣይኔ ኣይፌይ ባይንዳይታ ጊዶንታ ማላ ናጋና።

9 ሃይቲ ሃ ሚሻቲ ባይንዳ ኣሲ ጊዲኮ ሃሆን ዲዛ ሚሽ ዳሞንታ ቆቄ ኣሳ ማላ፤ ሄሳዴይ ካሴ ኣጁዳ ባ ናጋራፔ ጌዱዳይሳካ ባሌቲዳስ።

10 ታ ኢሻቶ! ሄሳ ጊሻስ ኢንቴ ጸይጌቲዳይሳኔ ዶሬቲዳይሳ ሻኪ ኤራናስ ከሄ ኣሞቲዛይታ ጊዲቴ፤ ኢንቴ ሄሳሶ ኦሊኮ ሙሉካ ጹዕቴኬታ።

11 ኢንቴ ሄሳሶ ሃንኮ ሜርናፔ ሜርናስ ዲዛ ኑ ጎዳ ዬሱስ ኪርሰቶስ ካዎቴላን ጌላናስ ኢንቴሰ ኩሜላ ማታይ ኢሜታና።

12 ኢንቴ ሃይታ ሃ ዮኦታ ኤሪዲኔ ኢንቴ ኤሪዳ ቱማን ሚኒ ዴኢኮካ ሃይታ ታኒ ኢንቴና ቆፍሳናፔ ጉዬ ጊኬ።

13 ታኒ ፓጳ ዲዛ ዎዴ ኡባን ኢንቴና ኡባ ዎዴ ዴንፊላናይሲ ቤሲዛዝ ሚሳቲዲ ታስ ቤቴስ።

14 ኑ ጎዳ ዬሱስ ኪርሰቶስ ታስ ቆንጨሲዳ ማላ ታኒ ሃይሳ ኣላሜዛፔ ኤሌላዳ ሃይቃናይሳ ታ ኤራይስ።

15 ታኒ ሃኢ ሚኔቲዛይ ታ ሃይቃዳ ኢንቴፌ ሻኬቲዳፔ ጉዬ ኢንቴ ሃይታ ሃ ዮኦታ ኡባ ዎዴ ቆፓና ማላሳ።

ኪርሰቶስ ቦንሾ ባ ኣይፌን ቤኢዳ ማርካታ

16 ጎዳ ዬሱስ ኪርሰቶስ ዎልቃፌ ኢዛስ ዩሳ ጊሻስ ኑ ኢንቴሰ ዮቲዳ ዎዴ ኦኒ ኑ ኣይፌራ ኢዛ ቦንሾዛ ቤኢዲ ማርካቶስ ኣቲን ኣሲ ጮ ሜላ ሜጲ ኤኪዲ ጌኔ ሃሳይዛ ሃይሲኤ ማላ ጊዳና።

17 «ታኒ ኢዛን ኡፋዬቲዛዴይ ታ ዶሲዛ ታ ናዚ ሃይሳ» ጊዛ ቃላ ገሪሳይ ጊታ ቦንሾራ ኢዛስ ዬዳ ዎዴ ኢዚ ጸሳ ኣሞፔ ቦንሾኔ ጊታቴላ ኤኪዳስ።

18 ኦኒ ኢዛራ ኣንጃቲዳ ዙማ ቦላ ዲሼ ሃይሳ ሳሎፔ ሃ ዬዳ ገሪሳ ኦኒ ኑ ሃይላን ሲዬዶስ።

19 ሄሲ ወሪካ ካሴ ናቤቲ ዮቲዳይሲ ቱሙ ጊዲዳይሳ ሎኤሊ ቆንጨሲስ፤ ሄሳ ጊሻስ ኢንቴ ጹማሶን ዲዛ ጸሞፔስ ሎኤሊ ናጌቲዛይሳ ማላ ካሴ ናቤቲ ዮቲዳይሳ ሎኤሊ ናጌቲቴ። ኢንቴ

ሃሳሉ ከላናይ ጋዴይ ዋንታናሰ፡ ባዞይ ዞኣና ጋካናሲኔ ዋንቲ ማላ ጸሊንቴዚ ኢንቴ ዋዚናን ፖኣና ጋካናሳ፡፡

²⁰ ኢንቴ ሃራፔ ኣሉ ቆፓናሰ ቤሲዛይ ጌሻ ማጸፋን ዲዛ ቲንቢቲ ቃላን የቴቲዳ ኣይ ሚሺካ ኦኒካ ባሰ ሚሳቲዳ ማላ ቢርሻናሰ ቤሲና፡፡

²¹ ኣይ ቲንቢቲይካ ኣሳ ሸኔ ማላ ሙሌካ ዪቤና፤ ጊዶ ኣቲን ቲንቢቲይ ዉሪካ ጸሎ ኣያናይ ካሌሊን ኢዛ ካሊዳ ኣሳቲ ጸሳፌ ኤኪዲ የቴዳዛ፡፡

2

ዋርዶ ኣስታማራታ

¹ ጊዶ ኣቲን ቤኒ ዋዴ ዋርዶ ናቤቲ ዴሬ ጊዶን ዲዛይሳ ማላ ሃሳሉካ ሃኢ ኢንቴ ጊዶን ዋርዶ ኣስታማራቲ ዴኣንዴቲሰ፤ ሄይታንቲ ኣሳ ቆይሲዛ ዋርዶ ቲሚርቲ ቆታራ ዲጫና ማላ ኦሌቲሰ፤ ባና ኣሺዳ ጎዳካ ካዲዲ ባና ኤሶን ቆይሲዛዝ ባ ቦላ ኤሄቲሰ፡፡

² ሄሳ ጋሶን ዳር ኣሳይ ዬላቺዛ ኢስታ ኦጌዛ ካሌሰ፤ ሄ ኢስታ ኦሶዛ ጋሶን ቱማ ኦጌይ ጫዬቲሰ፡፡

³ ሄይቲ ዋርዶ ኣስታማራቲ ሚሻሰ ጋጺጋጺዛ ጊሻሰ ባርካ ሜጲ ኤኪዳ የኦ የቲ የቲዲ ኢንቴሰ ዲዛዝ ባሰ ቦንቂ ኤኬቲሰ፤ ቤኒ ቤኒሶፔ ፒርዳይ ኢስታሰ ጊጌቲ ኡቲዴሰ፤ ኣዳፌ ኢስታ ቆየይ ናጌሰ፡፡

⁴ ሃራይ ኣቶሺን ናጋራ ኦሊዳ ኪታንቻታሰ ጸሲ ሚሹቶንታ ኢስቲ ጨማ ጊዲዳ ቆማ ኦላ ጊዶን ዴኢዲ ፒርዳ ጋላሰ ጋካናሰ ናጌታና ማላ ጌዳ ጋናሜን ዬጊዴሰ፡፡

⁵ ሃሳሉካ ጸሎቴላ ጊሻሰ ሳባኬ ጊዲዳ ኖሄ ሃንኮ ላቸን ኣሳታራ ኣሺዲ ጸሳሰ ጎይኖንታ ኣሳቲ ዲዛ ኣላሜዛ ቦላ ቆይሲዛ ሃሌ ኤሂሹ ቃዴቲዲ ካሴ ሄ ዋዴ ኣላሜዛ ማሪቤና፡፡

⁶ ቃሴካ ጸሰ ጎይኖንታይታ ቃጸያናሰ ኡባሰ ለሚሶ ጊዳና ማላ ሶዶሜይኔ ጋዋራ ካታማቲ ቢዲንሐ ጊዳና ጋካናሲኔ ጽጌቲ ቆያና ጋካናሰ ኢስታ ቦላ ፒርዲዴሰ፡፡

⁷ ዋጋይ ባይንዳ ዬላቺዛ ኦሶ ኦሊዛ ኣሳታ ኦሶን ኡባ ዋዴ ሶኡ ጊሹ ዲዛ ጸሎ ሎጼ ጊዲኮ ኣሺ ኤኪዴሰ፡፡

⁸ ሄ ጸሎ ኣዴዚ ኢስታ ጊዶን ዲሺን ጋላሰ ጋላሰ ኢዚ ቤኢዛይሳኒ ሲዩዛይሳን ሄ ዋጋይ ባይንዳ ኣሳታ ኦሶዛን ኢዛ ሽምፖያ ዋዬታዲሰ፡፡

9 ሂሰቲን ሄሲ ወሪካ ሄሳ ማላ ጊዲኮ ጎዳይ ባስ ጎይኒሼ ዲዛ አሳታ ፓጩፔ አሻናይሳኔ ናጋራንቻታካ ዋስቲ ቃጸያናኮኔ ፒርዳ ጋላሳስ ዋስቲ ኢስታ ናጊዲ ጋላናኮ ሄሳ ኢዚ ኤሬስ ጉሳ።

10 ሃራፔካ ሄይቲ ቱና ጊዲዳ ባ አሾ አሞ ካሊዛይታኔ ጸሳ ጎዳቴላ ካጂዛይታ ፒርዳ ጋላሳስ ናጊ ዋሴዴስ። ሄይቲ ዋርዶ አስታማሬቲ ኢስቲ ጸላታኔ ኦቶራንቻታ ጊዲዳ ጊሻስ ሳሎ ቦላ ኢስታስ ጎዳቴላ ዲዛይታ ጫዪሼ ባቤቴና።

11 ኪታንቻቲ ኢስታፌ ቦላራ ዋልቃይኔ ጎዳቴላ ዲዛይታ ጊዲኮካ ጎዳ ሲንፋን ኢስታ ቦላ ካጄ ቃላ ኬሲ ሞቴቴና።

12 ሄይቲ ዋርዶ አስታማሬቲ ጊዲኮ ባስ ኤሬቶንታ ኢጲዳ ሚሽ ኡባ ጫሽ ጫዬቴስ፤ ሄይታንቲ ናርጸን ኦይኬታናሲኔ ሃይቃናስ ዬሌቲዳ፤ ጮ ሚላ ባ ሺኔን ዲዛይታኔ ቆፋይ ባይንዳ ዶኦታ ማላ፤ ዶኦቲ ጮ ሚላ ጳይዛይሳላ ኢስቲካ ሙሌራ ጳያና።

13 ቆሆ ኦሶ ኦሴዳ ጊሻስ ኢስቲ ሙሌራ ባ ኦሶ ዋጋ ኤካና፤ ኢስታ ኡፋይሲ ሴታ ጋላስ ማፉቴላኔ ዋጋይ ባይንዳ ቡራቆ፤ ኢስቲ ሄሳ ማላ ዋጋይ ባይንዳ ጉፋን ኢንቴናራ ኢሲፌ ጸይጌቲዛ ዋዴ አስ ባሌላዛ ባ አሾ ኦሶዛን ኢስቲ ኢታኔ ዬላቺዛይታ።

14 ኢስታስ ናጋራ ኦሶፔ ናጌቶንታ አሞቲዛ አይፌይ ዴስ፤ ኢስታስ ናጋራ ኦሶ ሲቂዛ አሞቴላ አይ ዋዴካ ሲሜና። አማኖን ቡሮ ሚኒ ኤቆንታ አሳታ ባሌጩስ፤ ሚሻስ ጋጸጋጸቴስ፤ ኢስቲ ቃንጌቲዳይታ።

15 ኢስቲ ሱሬ ኦጌዛ አጊዲ ጳይዳ፤ ኢታ ኦሶ ኦሴዳ ዴሚዛ ሚሽ ሲቂዳ ቢኦሬ ና ባላአሜ ኦጌ ቢዲ ባሌቲዳ።

16 ባላአሜይ ጊዲኮ ባ ኦሴዳ ናጋራ ጊሻስ ሴሬቲዴስ ሺን ሃሳያ ኤሮንታ ሃሬያ አሳ ቃላን ኢዛስ ሃሳያዳ ሄ ናቤዛ ባላፔ ሴራ ዛራዲስ።

17 ሄይቲ ሄ አሳቲ ሃላ ባይንዳ ፑልቶታ፤ ጎቴ ጫርኮን ቢዛ ሻራ ማላ፤ ኢስታ ሳካና ጳማይ ናጌስ።

18 ካሴ ባላ ጋርሳን ዲዛ አሳታ ጊዶፌ ኬሲ ኤኪ ዩዲ ዳሮ ጋሞኦንታ አሳታ፤ ሃዳ ጊዲዳ ኦቶሮ ቃላ ሃሳያን፤ አሾ አሞኒኔ ላይማን ባሌጩስ።

19 «ኢንቴ ዋዜታና» ጊሼ ኢንቴስ ኡፋይስ አሜቴስ፤ ጸኔቲዳ አሲ ባና ጸኒዳዴስ አይሌ ጊዲ ሃሬቲዛይሳላ ኢስቲካ ባስ ናጋራስ አይሌ።

20 ኑ ጎዳኔ ኑና አሺዳ ዬሱስ ኪርስቶሳ ኤሪዲ ሃ አላሜዛ ቱናቴላፌ ኬሲ ኤኪዳፔ ጉዬ ቃሴካ ጉዬ ሲሚዲ ሄ ካሴ

ቱናቴላን ጸኔቲዲ ጌሊኮ ኢስታስ ካሴይሳፌ ጉዬይሲ አጾ ኢታ ጊዳና።

²¹ ኢስቲ ጸሎቴላ ኦጌ ሻኪ ኤሪዳፔ ጉዬ ኢስታስ ኢሜቲዳ ጌሻ አዛዘዛፔ ጉዬ ሲማናፔ ኢስቲ ካሴ ሄ ጸሎቴላ ኦጌዛ ኤሮንታ አጊዳኮ ኢስታስ ሎኦኮሺን።

²² «ካናይ ባ ፎዬዳ ፎሻ ማናስ ጉዬ ሲሜስ።» ሄሳሶካ፥ «ጉዲንሊ ሜጨቲዲ ጉዬ ሲሚ ኡርቃን ጌንዴሬቴስ» ጌቴቲዛ ቱሙ ለሚሶይ ኢስታ ሶላ ጋኪዴስ።

3

ጎዳ ዬሱስ ከርስቶሳስ ናምኣንሶ ዩስ

¹ ታ ሲቆቶ! ታኒ ኢንቴስ ጸፊሺን ሃይሲ ናምኣንሶ ኪታ፤ ታኒ ኢንቴስ ናምኡ ኪታታካ ጸፊዳይ ሃይታ ሃ ዮኦታ አኬኪ ኤኪዲ ኢንቴ ሱሬ ቆፋ ቆፓና ማላ ኢንቴና ቤጎላናሳ።

² ሃይሳፌ ካሴ ጌሻ ናቤቲ ዮቲዳ ቃላኔ ቃሴ ሃዋሬታ ባጋራ ኢንቴ ዳሚዳ ኦ ጎዳኔ ኦና አሺዳይሳ አዛዘ ኢንቴ ዩሺ ቆፓና ማላ ታ ኮያይስ።

³ ሃራ ኡባፌ ካሴቲዲ ሃይሳ ዩሺ ቆፒቴ፤ ወርሴላ ጋላሳታን ቂጲዛይቲኔ ባ ኢታ አሞ ካሊሺ አስ ካጲዛይቲ ያና።

⁴ ኢስቲ፥ «ጎዳ ዬሱሲ፥ ሃና፥ ጊዛ ሂደታይ ዮቴቲቤኔ? ሂስቲን ኢዚ አዋን ዲዜ? ቤኒ ኦ አዋቲ ሃይቆሶፌ ሃ ሲሚን፥ ሃኒዛ ሚሺ ወሪካ ሜጼቶሶፔ ሃ ሲሚን ሄኮ ካሴ ባ ዲዛ ማላ ዴስ» ጌቴስ።

⁵ ሄይቲ ሄ አሳቲ ካሴ ዳሮ ዋዴፔ ካሴ ሳሎይ ጸሳ ቃላን ሜጼቶይሳኔ ቢታይካ ሃላፌኔ ሃላን ዲዛይሳ ኤሪሺ ካዴቴስ።

⁶ ሄ ዋዴ ዲዛ አላሜዚ ሃላን ሚቴቲ ጳይዴስ።

⁷ ሄሳሶካ ሃኢ ዲዛ ሳሎይኔ ቢታይ ናጋራንቻቲ ጳያና ዲዛ ፒርዳ ጋላስ ጋካናስ ታማስ ጊጊ ኡቲዳ።

⁸ ታ ሲቆቶ! ኢንቴ ጊዲኮ ጎዳ አቻን ኢሲ ጋላሲ ሺ ላይላ ማላ፤ ቃሴካ ሺ ላይሊ ኢሲ ጋላሳ ማላ ጊዲዳይሳ ሄሳ ሄ ሃናዛ ባሎፒቴ።

⁹ ኢሲ ኢሲ አሳታስ ሚሳቲዛ ማላ ጎዳይ ባ ዮቲዳ ሂደታ ቃላ ፖላናስ ጋምኤናኮሺን አሲ ወሪካ ማሬታና ማላኔ አይ አሲካ ጳዮንታ ማላ ኮዬዲ ኢዚ ኢንቴ ጊሻስ ታኬስ።

10 ጎዳ ጋላሳይ ቃሴ ካይሶ ዩፋ ማላ ቆፖንታ ዲሺን ጋኪ ዋቆና፤ ሄ ጋላስ ሳሎቲ ጌታ ጌሪሳን አቆና፤ ሜዴቴላ ወሪካ ታማን ጸጌቲ ቆያና፤ ቢታይኔ ኢዛ ቦላ ዲዛዚ ወሪካ ጸጌታና።

11 ሄሳ ጊሻስ ሄይቲ ወሪካ ሄሳፉ ቆያናዝ ጊዲኮ ሂስቲን ኢንቴ ጌሻቴፋን ጸሳስ ጎይኒሼ ዳናስ ኢንቴስ ዋኒ ቤሴኔ?

12 ሄሳ ጊሻስ ጸሳ ጋላሳይ ያናይሳ ኢንቴ ላሞቲዛይታኔ ኢዚ ኤሌሊ ያና ማላ ኦሊዛይታ ጊዲቲ። ሄ ጋላስ ሳሎይ ታማን ጸጌቲ ቆያና፤ ሜዴቴፋቲካ ታማ ሴላን ሴራና።

13 ጊዶ ኦቲን ኩኒ ኢዚ ኑስ አሚዳ ሂዶታ ማላ ጸሎቴፋ ኦሶይ ኦሴቲዛሶ ኦራፋ ሳሎኔ ኦራፋ ቢታ ናጎስ።

14 ሄሳ ጊሻስ ታ ሲቆቶ! ሄሲ ወሪካ ሃናና ጋላስ ኢንቴ ናጊሼ ዲኮ ጎዳይ ኢንቴና ኢንቴ ቦላ ቦሬይ ባይንዳ ዲሺን ሳርቴፋን ዴማና ማላ ሚኒ ዲቲ።

15 ኑ ጎዳ ዳንዳያይ ኢንቴና አሻናስ ጊዲዳይሳ ኢንቴ ኤሪቴ፤ ኑ ሲቆ አሻ ጳውሎሲ ባስ ኢሜቲዳ ኤራቴፋ ማላ ኢዚ ኢንቴስ ጳፊዳይሲ ሃይሳ።

16 ኢዚ ሃይሳ ሃ ሃናዛ ጊሻስ ባ ኪታታን ኡባን ሃይሳፉካ ጳፊዴስ፤ ኢዛ ኪታታ ጊዶን ኤራናስ ዋዪሲዛ ኢሲ ኢሲ ሃኖቲ ዴቴስ፤ ኤራቴላ ኢስታስ ፓጩዳይቲኔ ናሞኡ ቆፋን ዮቁ ጊዛይቲ ሃራ ጌሻ ማጸፋታ ሚርቂዛይሳፉካ ሃይታካ ኢስቲ ሚርቃና፤ ኢስቲ ሄሳፉ ኦሊዛይ ባስ ቆያናሳ።

17 ታ አሻቶ! ኢንቴ ቃሴ ሄሳ ካሴቲዲ ኤሪዳ ጊሻስ ሃንኮ ማካላታ ባላ ጋሶን ጎሼቲ ቢዲ ካሴ ኢንቴ ሚኒ ዲዛሶፔ ኩንዶንታ ማላ ናጌቲቴ።

18 ሄሳፌ ቦላራ ኑ ጎዳኔ ኑ ቆሌ ዬሱስ ኪርስቶሳ ኪያቴፋኒኔ ኢዛ ሻኪ ኤሮን ፑዴ ዲጩቲ፤ ኢዛስ ሃኢካ ሚርናስካ ቦንቾይ ጊዶ። አሚን።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b